

**FIANGONANA  
LOTERANA MALAGASY ORLEANS**

-----  
**Alahady 31 mey 2015  
ALAHADIN'NY TRINITE**

Ezek.18:30-32; Tit.3:3-7; Jao.3:1-15;  
Mat.28:16-20

► **Ezekiela 18:30-32**  
**[Ny famalian'Andriamanitra ny olona  
araka ny asany avy]**

30 Koa samy hotsaraiko araka ny  
ataonareo avy hianareo, ry  
taranak'Isiraely, hoy Jehovah Tompo.  
Mitodiha, ka mibebaha amin'ny  
fahadisoanareo rehetra, dia tsy ho tonga  
fahatafintohinana mahameloka anareo  
intsony izany.

31 Esory ho afaka aminareo ny  
fahadisoanareo rehetra izay  
nataonareo, ka manaova fo vaovao sy  
fanahy vaovao ho anareo; fa nahoana  
no ho faty hianareo, ry taranak'Isiraely?

32 Fa tsy sitrako ny fahafatesan'izay  
maty, hoy Jehovah Tompo. Koa  
mibebaha hianareo mba ho velona. Hira  
fahalalohelovana ny amin' ireo lehiben'ny  
Isiraely.

► **Titosy 3:3-7**

3 Fa isika koa dia adala fahiny, tsy  
nanaiky, voafitaka, dia andevon'ny filàna  
sy ny fahafinaretana maro, ary velona  
teo amin' ny lolompo sy ny fialonana,  
sady hala no nifankahala.

4 Fa rehefa niseho ny fahamoram-  
panahin'Andriamanitra, Mpamonjy  
antsika, sy ny fitiavany ny olona,

5 dia tsy avy tamin' ny asa amin'ny  
fahamarinana izay nataontsika, fa araka  
ny famindrampo kosa no namonjany

antsika, tamin'ny fanasan' ny fiterahana  
indray sy ny fanavaozan' ny Fanahy Masina,  
6 Izay naidiny betsaka tamintsika tamin'ny  
alalan'i Jesosy Kristy, Mpamonjy antsika,

7 mba hohamarinina amin'ny fahasoavany  
isika ka ho tonga mpandova araka ny  
fanantenana ny fiainana mandrakizay.

► **Jaona 3:1-15**  
**[Ny resak'i Jesosy tamin'i Nikodemosy]**

1 Ary nisy Fariseo anankiray atao hoe  
Nikodemosy, mpanapaka tamin' ny Jiosy.

2 Izy nankao amin'i Jesosy nony alina ka  
nanao taminy hoe: Raby ô, fantatray fa  
mpampianatra avy amin'Andriamanitra  
Hianao; fa tsy misy olona mahay manao  
izao famantarana ataonao izao, raha tsy  
Andriamanitra no momba azy.

3 Jesosy namaly ka nanao taminy hoe:  
Lazaiko aminao marina dia marina tokoa:  
Raha tsy ateraka indray [Na: ateraka avy  
ambony] ny olona, dia tsy mahazo mahita ny  
fanjakan'Andriamanitra.

4 Hoy Nikodemosy taminy: Hataon' ny olona  
ahoana no hateraka rehefa lehibe; moa  
mahazo miditra any an-kibon-dreniny indray  
va izy ka hateraka?

5 Jesosy namaly hoe: Lazaiko aminao  
marina dia marina tokoa: Raha misy olona  
tsy ateraky ny rano sy ny Fanahy, dia tsy  
mahazo miditra amin' ny  
fanjakan'Andriamanitra izy.

6 Izay ateraky ny nofo dia nofo; ary izay  
ateraky ny Fanahy dia fanahy.

7 aza gaga noho ny nilazako taminao hoe:  
Tsy maintsy hateraka indray [Na: hateraka  
avy any ambony] hianareo.

8 Ny rivotra mitsoka amin'izay tiany, ary  
renao ny feony, nefa tsy fantatrao izay  
ihaviany na izay alehany, dia tahaka izany  
izay rehetra ateraky ny Fanahy.

9 Nikodemosy namaly ka nanao taminy hoe:  
Hatao ahoana no hahatonga izany zavatra  
izany?

10 Jesosy namaly ka nanao taminy hoe:  
Hianao va no mpampianatra ny Isiraely ka  
tsy mahalala izany zavatra izany?

11 Lazaiko aminao marina dia marina tokoa:  
Izay fantatray no lazainay, ary izay hitanay  
no ambaranay; nefa ny fanambaranay tsy  
raisinareo.

12 Raha ny zavatra ety an-tany aza no  
nolazaiko taminareo ka tsy inoanareo,  
ahoana no hinoanareo, raha milaza  
aminareo ny zavatra any an-danitra Aho?

13 Ary tsy nisy niakatra ho any an-danitra,  
afa-tsy llay nidina avy tany an-danitra, dia ny  
Zanak'olona, Izay any an-danitra.

14 Ary tahaka ny nanandratan'i Mosesy ny  
menarana tany an-efitra no tsy maintsy  
hanandratan'ny Zanak' olona,

15 mba hanana fiainana mandrakizay izay  
rehetra mino Azy.

► **Matio 28:16-20**  
**[Ny nitsanganan'i Jesosy tamin'ny maty,  
sy ny nisehoany tamin' ny mpianany]**

16 Ary ny mpianatra iraka ambin' ny folo  
lahy dia nankany Galilia, ho any amin'ilay  
tendrombohitra nasain'i Jesosy halehany.

17 Ary nony nahita Azy izy, dia niankohoka,  
fa ny sasany niahanahana.

18 Ary Jesosy nanatona dia niteny taminy  
ka nanao hoe: Efa nomena Ahy ny  
fahefana rehetra any an-danitra sy ety  
an-tany;

19 koa mandehana hianareo, dia ataovy  
mpianatra ny firenena rehetra, manao  
batisa azy ho amin'ny anaran' ny Ray sy  
ny Zanaka ary ny Fanahy Masina

20 sady mpianatra azy hitandrina izay  
rehetra nandidiako anareo; ary, indro,  
Izaho momba anareo mandrakariva  
ambara-pahatongan'ny fahataperan'izao  
tontolo izao.

FLM Orléans – [www.flm-orleans.org](http://www.flm-orleans.org)